

重修興平縣志

墨修
縣志

徐懷璋署

民國十二年
李春月鉛印

重脩興平縣志敘

民國建元之十有二年歲首之月重脩興平縣志既脫稿將成書局中同事諸君子來索敘予謂縣之有志猶國之有史也一國之史官有專司日有記錄故其典章文物燦然大備而無或缺至其成書則必待諸易世而後予奪褒貶出以至公所以昭弈世示來茲也而縣志一書其體例規模蓋亦仿諸史但脩訂之期往往經數十年而一脩或百數十年而一脩其間風俗之良窳政治之改革人才之興衰地域之變遷恆不能得其梗概蓋書闕有間不得隨時增脩爲之弊也壬戌夏予奉命來代斯邑篆下車之始卽取斯邑舊志而翻閱之見此志爲有清中葉

乾隆四十二年邑侯顧君聲雷奉大中丞鎮洋畢公命而重脩之本體例雖合載籍亦富其考据沿革確亦信而可據無如越時既久於近百數十年來無所徵文獻焉固不獨爲本邑士大夫之羞抑亦官斯土者不能辭其責也則夫重脩之舉又顧可緩乎哉然其時戎馬倉皇之餘萑苻擾攘之際大軍駐境供應浩繁又兼招聚流亡勞於撫字有志未逮良用皇然八月秋丁釋菜於泮宮大會閤邑師儒撤饌享餘因與耆宿張君曉山徐君奉伯馮君孝伯共商重脩之議三君極力讚同並允分纂之任遂於某月某日設局開辦搜羅採訪日起有功而三君亦燃椽燭呵凍筆孜孜矻矻昕夕靡已越四閱月而書成速矣哉亦

苦矣哉體例較舊志爲緊嚴規模較舊志爲完備惟人物一志義烈節烈各門所收較多未免滋議然淬薄俗而厲頹風取資觀感於義法固無所乖也斯書一出論世者其殆將以斯爲知言歟予亦適於是時奉命調代華陰倚裝走筆率爾書此不過聊以誌茲事之緣起云爾

民國十二年一月卸任興平縣知事燕南王廷珪季瞻氏敘

序

余蒞興之明年春適邑乘重修告成董其事者句一言以弁諸簡夫志之名始於班書體昉於決錄黃圖備掌故彰往哲也吾謂尤在勸來者來者不勸往哲陳迹等芻狗耳奚以迪前徽而發揚光大乎興之往哲若竇馬若耿班史策焜燿炳炳乎稱極盛已乃時閱千餘年後人材衰減大異疇昔不惟伏波定遠之勛名郭伋秦彭之吏治鳳毛麟角莫之能得卽馬融賈逵之儒林班固傅毅之文學亦寥寥不可復睹宋元迄今竟無一人與於史氏之傳者豈黃山清渭之間氣洩於前而莫之繼歟抑王都東遷雖有其人而振拔莫由歟夫極盛固難爲繼而剝久亦

自當復興之人材弗振久矣吾甚願邦之人士立德立功立言
與寶馬耿班後先輝映則所以光岳色而壯河聲者固大有在
甯止絢槐里清華增茂陵典重已哉余忝長縣例須一言然事
之緣起王知事既詳於前志之體例諸編輯又臚於後不復再
贅惟舉興產之垂大名於宇宙抗威稜於絕域者弼之襮之以
勗茲邦邑人士而郭秦諸循良政績爲吏者皆可師也亦用以
自勗焉癸亥仲春山右禹都李居義識於署之海棠軒

序

余主清麓講席後蟄鄉溫舊業間率孫曾採蔬觀稼老自適也
孟秋丁祭前日知友約入廟陳設遇縣長王公季瞻揖而坐談
公卽訂修縣志以譟陋辭公曰偕奉伯孝伯二君爲之不自量
其昏眊遂忝與分纂之役焉竊嘗思之古蹟陵墓一土邱耳奚
足令人馳念碑志金石一殘文耳奚足令人生欽官師人物骨
灰已久奚足令人仰止千百年以前之人事能令千百年以
後之秉筆者外詳採訪內極摹寫低徊往復惟恐有遺又恐失
眞蓋必有所以致此者而後念之欽之仰止不遑也夫彰前所
以勸後後者不勸空文何裨今之秉筆者其他日之土邱殘文

興平縣志
官師人物也能令爲此者低徊往復乎能令閱者念之欽之仰
止乎逐類以思其所書者無非自歉之端卽無非自愧之端更
無非自奮之端也予年七十有二矣老陋無成二君將近班白
程子云不學便老而衰是學則不衰也朱子云一息尙存此志
不容少懈是懈則空存也昂昂七尺之軀蜉蝣黃山渭水之間
不自振拔虛擲何爲惟有法程之學朱之不懈以與邑人士交
勉冀爲他日欽之念之仰止之人也是則區區之志也張元際
撰

序

輯一邑千百年人物事變而都爲一書而曰志志也者所以覘風俗考政治別人才也吾興志書前乎此者有斗陽章公矣繼之者胡公蛟齡也又繼者顧公聲雷也續士女者王公心如也義例精嚴取裁詳慎今復幾厯世矣文獻無徵于焉滋懼歲壬戌季瞻王公有修志之舉張君曉山馮君孝伯實與茲役懷璋亦濫竽焉書旣成顏之曰重修興平縣志爲卷八曰地輿曰建置曰田賦曰官師曰人物曰風俗曰藝文曰雜識庶使後之君子得所觀覽焉抑余竊有說焉天下不患無善俗而患無政教不患無政教而患無人才沫邦淫酗康叔作新江漢泳方召公

成化轉移風尚之權其果操之氣數歟興平當兩漢時人才輩出所爲焜耀於道德功名文章之地指不勝屈自唐以後風氣蓋少歇焉雖高官厚祿亦復誇耀一時不數傳而風流雲散求所謂及當世而昭來許者蓋寥寥罕覩也然則生是邦者當思奮發孟晉追躡前蹤如世所稱仲舒伏波孟堅其人者爲之發百代之華而壯鄉邦之采而使後之操史筆者得不枯於墨池之瀋斯誠地靈之所默慰而人倫之所靳期者也因輯邑乘而低徊及之願與興人士共勉焉邑人徐懷璋謹譔

序

周禮小史掌邦國之志今之郡縣古之小侯邦國之志卽今郡縣之志也蓋封建之世太史采詩以觀風俗小史稽志以備掌故凡以課邦國之敝最以裨補政教法至善也郡縣制行中央集權王朝有史邦邑無志小史職廢而天下郡國之文獻失傳久矣自黃圖決錄諸書出乃始爲方志權輿自朝邑武功諸志出而邑乘又多善本新城王文簡公云有明一代郡邑名志多出於秦朝邑武功爲之最四庫提要亦數數褒贊及之豈以義法精旨辭契規撫龍門一洗地志繁冗之弊耶亦箴砭政俗於義尤有取爾也清宮讓政國號共和雖曰民主民之憔悴也實

甚兵禍之酷烈糾紛賦歛之負擔日重青青子矜半襲戎裝鬢
宮廟學鞠爲茂草水旱之災降自天植礦之貨棄於地物產不
見盈豐風俗日益侈敝無以紀之奚以考世變而爲補牢之計
乎吳橋王季瞻先生宰是邑於軍務倥傯之暇急集同人重修
邑志事有似緩而實急似迂遠之務方靈皋所謂於世道人心
政法默有關係者僅云備一邑故實抑末也裕承謹諉承乏茲
役編纂既竟例得颺言略述志乘興替之由而媵以民國之近
狀知今茲之舉微特存此邦文獻元元憔悴之秋或因此刼餘
文字以解倒懸於萬一焉當亦仁人君子所樂於觀覽者也邑

人馮光裕謹撰

凡例

一此次編輯邑志係合胡志顧志王志及續纂而成名曰重修興平縣志

一顧志之修訖於乾隆四十二年後雖有士女續志其他各門均係缺如故提倡重修以資考鏡

一續修方志本宜遵章氏義例別纂後惟顧王諸志卷帙已繁再續則殊嫌旒贅故倣班書融納史記之例都爲一集以便檢閱

一乾隆四十二年前多仍舊志間有刪節因限卷幅欲觀其詳舊志俱在

一登載人物例以四則或經國家章表或有著作尙存或因譜牒可徵或以輿論素孚符此則登背此則否採訪雖勤耳目難周不無遺珠之憾達者諒之

一人物志名臣改書列傳名儒改書儒林佞倖宦寺改書雜傳悉沿史傳舊名非敢臆造

一舊志有高士一門今無其人甯缺無濫新增一行賢媛諸傳例詳志中

一科貢之年代有無學員之畢業與否婦女事蹟之詳略失於不載與失於濫載者竊恐不少但據採訪所及一一照登

一議員及畢業學員皆係新增政體既更功令宜從惟舊志載

止貢生此次載錄限以中學以上

一惲敬氏云清制命婦不旌門旌門之典爲庶民設也然窮氓下戶與者寥寥此次採錄節婦耳目所及已旌未旌一不敢遺闡幽表微義在於斯

一此次輯志溯自乾隆百六十年之故事傳訛挂漏極知不免閱者諒之

一修志係通儒之事不佞識旣禱昧學復荒落濫竽斯役愧無勝任搜輯成帙留後賢刪潤之稿而已如云修志則吾豈敢